

112 年全國語文競賽客家語朗讀文章國中學生組（四縣腔）

編號 1 號

【線上學習】李秉璋原作

神奇、神奇、真神奇，上課毋使鬥緊，交通毋會塞，想愛學麼个，就學麼个。先生在僱擇，時間在僱選，三更半夜也做得，先生講到生趣又分明。佢做得係學生仔个先生，也做得做先生个先生，總講佢桃李滿天下，毋使準備拜師禮，毋使納學費，你想愛學，佢就會教。

毋管你係即靈抑係戇霸，佢都收。佢無擇學生仔、無擇時間、無擇所在，單單擇你，擇你想愛學个心。這係學習个革命，這係時代个轉變。來了急、來了遽，跔得著大進步，就像係脣頭有仙人指點，武功大進。

馬桶毋曉整有人教，鏈鋸毋曉使，一步一步來，倒訣¹分你知。網路線个接頭線路毋曉排，有人教你色地愛分明，五花十色照順序，工具合特別，頭尾一下同佢夾落去，接頭插落網路通。

雖然講一個銀角仔毋會響，毋過先生大部分都係自家在該唱戲，講到口涎波潑，精神飽滿，歡頭喜面，若人个都毋會瘥又合有耐心！一遍教毋會，過教一遍，你想愛學幾多擺就學幾多擺，

學到你自家無愛。

千里緣分一線牽，天下盡在僱彈指間。現代生活真鬆爽，冷氣吹，彈指間，毋使出門、毋使尖車，想愛仰仔學就仰仔學。就算係疫情時節，學校个線上教學，有一息仔無恁自由，毋過也有人當認真，煞猛聽課，煞猛查資料，正經係一踢三通，師傅渡入門，修行在個人。上課講義自家留，毋使抄，三個快速鍵一揸，滑鼠一箍，講義就留下來。

上課當日先生有錄影：驚你單單係「用手機仔上課定定」，人毋知走哪位去。故所，先生上課會問問題，一半問，一半係在該點名，看你心思有在無？認真上課个，回答無問題、講頭就知尾，無用心个也無問題，平平無問題，這個係毋知半項，故所「無問題」。連先生喊佢回答，佢也係像係人間消失，無鏡頭、也無應聲，訊息欄項也無留字，故所佢正經係「用手機仔上課定定」。

線上學習，成就隨在人，逐儕有擇个自由，就愛對自家个人生負責。對自家未來正經个慷慨，就係同一切都貢獻分現時。今晡日个僱，成就天光日个僱。

¹ 倒訣：音 do` gied`；傾囊相授。

【火燒岫崗¹】李宜諭原作

在鄉下，鬧鬧熱熱个舊曆年一過啊忒，又伸著恬靜个生活。毋過，行過消防隊時，會看著該一臺一臺个消防車駛出車庫停在路脣，雖然看毋著無閒泊杈个身影，乜聽毋著緊張刺耳个警報聲，毋過，空氣裡背因等息把仔愛停動个電波，一種神經擱纏个氣氛。

舊曆二月係美濃人掛紙个時節，恁多年天時改常²，春雨慢到，二月个岫崗燥絲絲仔，故所，第一個拜六掛紙个臨暗開始，就會看著岫崗頂出現冲天个煙，接下來紅紅个火光就透出來吔：阿姆哀唷，火燒岫崗哩！消防車个身影像走相逐樣仔春一路出，警報聲在街路項颯等過³，一臺、兩臺、三臺……總概都出動哩，毋過，斷烏過後就難耐吔，高不將換手腳流掠个阿兵哥，拿等鏟仔、刀嫲同附近个竹頭、樹仔、草仔劈忒——斷火路。

第二日打早，「轟……叮叮叮叮、叮叮叮叮」直升機个聲就在天頂來來去去響無停。「直升機去美濃湖舀水哩啲！」美濃湖

黏時鬧熱起來，大家煞煞號隻好位仔，坐下來定定仔看等直升機在湖面舀水个景象。遠遠飛過來个直升機，會到美濃湖个時節，就會定定仔降下來，等到肚屎下背个大袋仔揆著水面，佢就會遽遽同袋仔向前拖一下再擲起來，淦淦一大袋个水就吊起來吔，續等就同這恁大袋个水晃晃激激⁴吊到廣善堂背个岫崗頂，對半天高倒啊下。恁大袋个水，隨化做一陣白白个濛煙散淨淨。

天頂个直升機一轉又一轉、對打早飛到斷烏；山腳下消防車个水一管又一管緊洩；岫崗該紅紅个火跡對山前遶到山背、對山坪遶到山頂。恬靜个暗夜，總會聽著竹頭燒到劈里啪啦⁵響个聲，火屎就跔等風一哪仔飛，等到天光該下，人家个屋頂、大路項、田坵肚跌到全全係烏烏个火燂煤。岫崗个火日夜燒等，山下个消防車、救護車、阿兵哥乜日夜掌等……。下把仔，伸著冲天个白煙，大家想愛轉擺⁶一下个時節，紅紅个火尾又好恬恬个躡啊出⁷，就恁仔一直愛燒到掛紙結束。

火燒岫崗對環境、對山林个破壞十分大，看著劈竹頭个阿兵哥分樹杈仔剛⁸到手同面都血流血著，實在分人已毋盼得！掛紙个方式，係毋係需要鄉親好好來思考、參詳呢？

¹ 岫崗：音 in gong^ˊ；小山崗。

² 改常：音 goi^ˋ song^ˊ；反常。

³ 颯等過：音 xiu den^ˋ go；行動迅速如風而過。

⁴ 晃晃激激：音 gong^ˊ gong^ˊ gieb gieb；因搖晃使得水從容器中溢出來。

⁵ 劈里啪啦：音 pi li pa la；擬聲詞。形容爆裂、拍打等的連續聲音。

⁶ 轉擺：音 zon^ˋ bai^ˋ；休息。

⁷ 躡啊出：音 liung^ˊ a cud^ˋ；鑽出來。

⁸ 剛：音 gua^ˋ；被尖銳的東西劃破。

編號 3 號

【鷓鴣飛啊飛】張瑞玲原作

打早，日頭正對東片鷓鴣背¹個後背跣起來，輝煌又晟目个金線就射入天頂。佢箭等該臺一騎就響歸路个老鐵馬，來到吾个百果園，還話講佢今晡日日頭一出來就到咗，算當早咧！無胚著，正踏入園肚，隔壁種大梨个阿權哥就在該大聲喊咧：「噯！日頭恁高咧正到哦，敢做有事？」

唉！佢都恁早咧，還輸佢，這阿權哥係歸暗晡毋使睡係無？仰會七早八早就來到？心肝還想等，嘴項又毋肯認輸，順嘴就應佢：「無啦！毋係來做事，來看鷓鴣得咗啦！」

吾个山園在山龍圍等个窩壠肚，若係堵著像今晡日恁樣个好天時，打早就會有三、四隻大鷓鴣，在四圍个山嶺頂飛啊飛欸。

同阿權哥个嘴鼓都還言搭煞，聽著遠遠个所在傳來「咻！咻！」个聲，鷓鴣出來咗！阿權哥看著鷓鴣出來，做等个山事也無心做咧，跣等一陣來搨接梨仔个工人，坐在吾工寮个蔭影²下欣賞這齣大自然个表演。

看佢兜閉開長長个翼胛、跣等氣流，慢慢仔迂、定定仔盤，

越迂越高、緊盤緊遠，到尾變做天邊个一粒烏點，就像係優雅个天頂王者，對天頂看等佢守護个土地。

成半下，還會看著佢兜胸挺挺、目盯盯仔停在脣項个樹極頂高，好恬恬無聲無說就從往下³，一矚目又轉身飛往上，該尖尖利利个爪項，既經夾等一尾挨著神頭个蛇哥，就一路「咻！咻！咻！」風神个飛入塞塞个樹林裡肚咗。

又成時，看佢兜在高高个天頂盤來飛去，忽然間，厥兩片翼胛一收，對天頂直直蹕⁴往下，吾心肝肚還想等：「這隻鷓鴣，這下穩死無命哩！」毋過，看佢硬硬都會撞著地泥咗，厥翼胛一閉、利爪一伸，一矚目時間，該利爪項，毋知哪時又抓著一隻圓身還在該扭啊扭个大老鼠咗。佢一轉身，又飛到半天高咧！

歸陣人看鷓鴣表演看到嘴擘擘仔，有人講：「難怪，在這搭山園做恁久事頭，難得看著蛇哥，就係有這兜鷓鴣守護這搭土地，戴在這四角圍个老嫩大細正有好安生生活啊！」

¹ 鷓鴣背：音 ieu po^ˇ zui^ˋ；東勢東方山峰名，華語稱鳶嘴山。

² 蔭影：音 im iang^ˋ；陰影。

³ 從往下：音 jiung^ˊ gong^ˊ ha^ˊ；往下俯衝。

⁴ 蹕：音 zud；觸擊、衝撞。

【竹蔗下个蟬仔】羅紫云原作

屋脣該墩竹蔗仔，種幾下年咁當大墩，斬忒又會過綻筍，繼續煞猛生到青禾禾仔，該竹蔗目長水多，清甜好食。

逐年大體到五月開始，日日到臨晝仔，竹蔗墩就會有一群著等青衫，當靚當得人惜个蟬仔。這兜頭大尾尖、翼又長个草蟬，細細仔像手指尾恁大隻定定，黏在這長長青色个竹蔗葉下，佢兜盡力拈在該啦歌哩曲，鬧熱煎煎。佢兜總係恁仔唱：「揸揸揸兒¹——揸揸揸兒——」清亮个歌聲，一直到下晝兩點零正會煞棚，毋識喊瘡。

草蟬仔下班過後，媠牯蟬²跔等上棚，佢黏在竹蔗仔脣該頭榮榮个苦棟樹頂，算係最大隻个蟬仔：圓身著等一身烏色个西裝盡亮線。大聲唱等佢兜个戀歌：「瞻³——瞻瞻瞻！瞻——瞻瞻瞻！」佢兜全部背等一臺天生个放送頭⁴，該聲骸放送到當遠个人都聽得著。佢心情好个時節，就阿腦佢兜唱歌仔真好聽；心情毋

好，又試著佢兜吵耳塞窟！毋過，一想著佢兜來到這世界，就淨短短幾日仔定定，就當佩服佢兜恁勇敢、恁煞猛打拚，來完成唯一愛做个聲事⁵——傳宗接代个精神。該，佢就無麼个好怨嘆，乜原諒佢兜个嘶骸另命咧！

在這鬧熱个時節，佢兜一張凳仔恬恬坐在竹蔗脣詳細聽，還會發現佢兜毋係儘採唱个哦！佢兜曉得照順序、有條理，成時獨唱、成時合唱，就像係有人指揮樣仔。佢兜个歌聲有時高亮、有時低吟，成下仔大聲、成下仔細聲；佢兜个音色乜無共樣，有个較尖、有个較溫柔。其實，蟬仔有當多種，佢兜一年、三年、五年、十三年、十七年，長年都歇在暗暗个泥竇肚。佢兜困在烏泥肚，培養破土个熱情，在多年个等待過後，化地底能量做聲量，衝破重圍，就為著這短短幾日仔个自由高唱。

佢心肝緊想：這墩竹蔗仔無掖肥，敢係因為聽了蟬仔熱情嘹亮个歌聲，正會緊生緊高緊榮？該佢兜人，乜愛像蟬仔恁知足，知恩圖報，逐日天轉笠媠花，這一生人就多姿多彩哩！

¹ 揸揸揸兒：音 iam iam iam iˊ；此指草蟬的叫聲。

² 媠牯蟬：音 maˊ guˊ samˊ；此指臺灣熊蟬。

³ 瞻：音 sam；此指臺灣熊蟬的鳴叫聲。

⁴ 放送頭：音 fong sung teuˊ；本指廣播電臺的放送亭、廣播站，後多指擴音器。

⁵ 聲事：音 sangˊ se；此指工作。

112 年全國語文競賽客家語朗讀文章國中學生組（四縣腔）

編號 5 號

【分牛籬蜂¹叨著】李政暉原作

佢分牛籬蜂叨著哩！

奈日朝晨，去山肚巡田水、做田事，無看著路脣个竹園項有大蜂竇，又無細義去撞著該支竹仔，佢兜就走來尋佢輸贏。惡豺豺仔个蜂仔黏時就飛在吾四圍挨挨轉，對等吾圓身黏一路來。佢掙忒一隻看知係牛籬蜂就驚到煞煞走，一片退、一片掙圓身同頭那毛頂項个蜂仔。退到無蜂仔个所在，正感覺著頭那昂昂、人怪怪，遽遽行轉屋下奈一下來。

無幾久吾頭那殼、圓身、手髀同脅下開始腫起來會痛：頭那殼感覺就像雲飄在天頂，又分人絢等：浮浮、胖胖膨膨合纏纏，試著頭那昂昂、無法度思考。左手巴掌腫到像紅板樣仔，手痺痺、手指尾會伸毋會鉤；坐毋核、睡毋得，唉唉唧唧正經艱苦。若係有陰間，該時个佢應該係戴在裡肚。

落尾分人送去病院掛急診，講有十過隻个蜂仔叨著佢了後，醫生當認真對佢講：一般來講，分牛籬蜂叨有二十針以上就可能冇生命危險，這種个蜂仔無解毒个血清、忒傷重有時節會引起過

敏性休克抑係溶血个症頭，盡好愛先通知若屋下人。醫生安排吊大笏射²、注射同抽血，吩咐佢先在醫院歇一暗晡，若係有麼个毋鬆爽愛黏時講。

等佢略略仔眠一下，感覺好當多就想愛轉。毋過醫生愛佢歇加一下正看啊，盡好愛等屙出來个尿色有正常，若係變做深深个泥色就較麻煩愛送去大醫院。愛過等，等無麼个问题正做得出院。包尾，都無問題咧，醫生還係吩咐講：「開个藥仔，愛照三餐食；係有哪位毋鬆爽，就愛趕緊過來哦！」

轉屋下換衫褲正知，佢總共分蜂仔叨著十六針，兩隻手髀發炎、腫腫，有鱗癢个。左手巴掌還係紅腫無感覺、頭那暈暈想愛睡。睡到半夜緊爪，癢到人硬硬想愛同皮掀起來，想愛爪到骨頭去。食藥仔、膏藥仔無麼个效，堵好有人紹介講臺灣有一種牛樟菇做得強肝解毒，無定著對蜂毒有效。食也，該暗晡，真神奇就好睡、毋會癢。

這下，分蜂仔叨个所在既經結痂也，看等這兜爛疤仔又加一擺分佢惱起：該時節、該兜蜂仔，佢一儕人在山肚，有幾危險也！

¹ 牛籬蜂：音 ngiu^ˇ lo^ˇ pung^ˊ；虎頭蜂。也說「油籬蜂」。

² 吊大笏射：音 diau tai gong^ˇ sa；吊點滴。

112 年全國語文競賽客家語朗讀文章國中學生組（四縣腔）

編號 6 號

【金黃色个旅行】曾雪蓉原作

旅行係一種盡好个休閒活動，做得分人个心情鬆爽，同最靚个回憶留下來，另外旅行也係一種學習，有一句話講：「行萬里路，贏過讀萬卷書」，在旅行个時節，一路項看著个、聽著个，可能比在書項學著个還較精彩、生趣。

印象裡肚，佢最懷念个一擺旅行，係前幾年俾八月半个時節，吾爺哀帶歸屋下人去花蓮遶祭。

佢兜來到花蓮富里个六十石山，一路項感覺花蓮个空氣特別好，一聲又一聲大鷄婆歡喜又自在个歌聲，響在彎彎幹幹个山路項，佢兜盤飛在高高个雲頂，打開梟雄个翼胛，無分日夜在這片山頭巡邏，佢兜係這片天地个山大王，也係保護者。

等阿爸同車仔停在忘憂亭，佢一下車就看著滿山坪个金針花開到當鬧、當打眼，想起識在電視裡肚看過一個紹介花蓮金針山个節目，講這位係一個靚到會分人「跳童」个所在，這句話正經半點都毋會差；在佢企在這高高涼亭个時節，看著歸片个山頭，變成金黃色个世界，間等泥香、野花香个山風對面吹過來該下，毋知仰仔，吾心肝頭就有一種感動還過幸福个感覺，佢想這就係

大自然个力量。

阿爸講：「前人種樹後人涼，前人種竹後人搖。」這山頭个金針花，係盡多前人開山打林開墾出來个，故所來到這邊祭个時節，愛曉得珍惜，毋單淨同這美景用相片帶轉屋下，也愛同自家个垃圾處理好，恁樣年年正有靚靚个風景好欣賞啊。

夕陽像一粒漬紅个柑仔，掛在天脣个時節，原本開到盡有精神个金針花，像約好共下下班樣仔，全眨等目珠互相偎憑，恬恬个睡忒咧；難怪金針花又安到「一日美人」，佢珍等朝陽疏床又在日頭落山時節，合起厥錫人个花蕊衫裙，做一個靚一日个美人。

時間過忒已久，有成時佢還係會想起該擺「金黃色个旅行」，親像又聽著大鷄婆歡喜个歌聲，盡久……盡久。

112 年全國語文競賽客家語朗讀文章國中學生組（四縣腔）

編號 7 號

【盡風神个社團活動】劉純汝原作

兩年前正開學時節，拿著社團選單，哇！一拖拉牯¹呢，有服務隊、排球隊，還有童軍團、熱舞社……，該央時，佢毋知愛選哪隻正好？欸，「西洋劍隊」！吾目珠一金，仰恁沙鼻、恁風神个名仔呢？「嗯，就選你哩！」

這下恁起，到入隊个第四隻月，佢總算有機會參加全國比賽！換佢上場哩：劍衫拉好勢，面落仔膠手落仔也戴好勢，夾起電衫、跔正馬步，盡拚哩啲！比賽一開始，佢拿等劍煞力牯滑步搶前進攻，使出蠻力拂啊拂欸。盲知，佢長刺、佢撥擋，佢飛刺、佢敲劍……，阿母哀！總下分佢閃淨淨，戰術也分佢看透透！吾个心肝發勾筋²，手腳亂忒哩，節奏也亂忒地；對手密密咻！咻！咻！咻，佢嘎緊揮空緊失分，輸到恹恹恹恹！

佢一比煞，軟怠怠个雙腳拓拓風跪落地，賠命个「啊」一聲，就像氣凹凹仔个鬥雞，落喪落喪³！原旦个自信怕係走到天頂同白雲搞園人尋去咧！

貼心个劍隊伴仔，全都行兼佢：有人送涼水、有人撚背囊、還有人摺佢搨核核，教練也柔柔仔安慰佢講：「人生啊，有時星光、有時月光，你打到當慶咧，下二擺再過加油！」目汁強強會忍毋核个佢，深深感受著佢兜親像寒天个細日頭，吾心肝肚黏時燒暖燒暖！

人講「臺頂三分鐘，臺下十年功」正經有影。聽起來恁風神个「西洋劍」，做起來無恁該！除忒考反應、比體力，還愛動腦筋、想戰術。這兩年來，一擺又一擺毋係你贏就係佢輸个比賽，分佢學習著：仰般面對失敗、仰般面對毋湛斗个自家，面對問題、解決問題！佢當煞猛打拚，發揮客家人硬頸精神个本等，練好基本功，抓捉要領；十年磨一劍！吾个劍術緊來緊進步咧，武藝比得古代个花木蘭哩！

「西洋劍」係源自十七世紀个歐洲，也係奧運比賽項目之一：有分鈍劍、銳劍、軍刀三種。競賽員比賽个時節，企在鐵枋仔頂高个兩片準備，等聽著「啊咧⁴」，用劍頭先刺著對手有效个部位就算得分，係嶄然有速度感摺爆發力个運動。

「西洋劍」毋單淨培養專注力、思考力，還有觀察力同判斷力，係「盡風神」个社團活動哦！

¹ 拖拉牯：音 to' la gu`；語源於日語「トラック」，卡車，此文形容很多之意。

² 心肝發勾筋：音 xim' gon' bod` giu gin'；指心裡很著急。

³ 落喪落喪：音 log song log song；表垂頭喪氣之意。

⁴ 啊咧：音 a le`；劍擊術語「Allez」，表「開始攻擊」。

112 年全國語文競賽客家語朗讀文章國中學生組（四縣腔）

編號 8 號

【 崁下該頭杳仔樹 】徐秀英原作

歇在鄉下，屋脊種幾頭仔番樣¹樹、牛眼、杳仔係當平常个，一到打子个時節，管佢有熟抑唔熟，反正食得个東西，細人仔絕對無放過佢！就係吵著睡當晝个叔公叔婆來大聲逐，該下晝就無戲好唱哩。

吾屋下就在伙房个最尾析，崎仔溜啊下就係礮崁，崁下个圳溝係細人仔熱天个天堂，洗身仔、庠魚仔、捉蝦公、釣蛤蟆蚱仔，麼个想得著个空頭，細人仔就搵得著來搞！該頭杳仔樹，就係對崁下該石壁項啲出來个。

吾婆當好食這頭个黃杳仔，見看著杳仔會食得該駁仔，佢就會怙等杖仔行兼來同佢這兜細孬仔講，青杳仔食地會屙硬屎，愛等佢黃地正好食。細人仔嘴項應講好，一群豺狗哪！哪管得著²佢兜該張嘴，幾雙賤手揪得著个，全部都摘來塞牙縫咧，除了打在忒樹尾摘毋著个！吾爸就會拿竹篙叉去夾下來，較硬个佢會自家食，較熟个佢會放在米缸裡背，翕加兩日仔正拿去吾婆間項。無牙齒个阿婆，糜啊糜欸，面項滿足个笑容，到這下佢都還記得。

¹ 番樣：音 fan' son；芒果。

² 哪管得著：音 nai gon` e` diauˇ；哪管得住。管不住。

該頭杳仔樹頂，輒常就會有青鸛仔³飛來做竇：青鸛仔毋驚人，佢兜在樹下搞家啦飯仔，佢兜在樹頂啾啾滾飛來飛去；細人仔雖然番綻，毋過從來毋識去撞過厥竇。較盤擎个會蹶上石壁去算看啊，竇肚生有幾多粒卵。一駁仔過後，樹頂又加加幾下隻得人惜个細鳥仔哩啲，就恁仔生生不息。

樹頂高也有膨尾鼠跳上跌落，還有共樣毋驚人个山狗太、狗嫫蛇趁上趁下。膨尾鼠尾絨絨，當得人惜，屋下食伸个果子抑係果仁、果子皮放在樹底下，佢兜會輪等跳過來食，咕嚕嚕个目珠仁挨挨轉，該驚人來搶食个樣仔，實在還生趣。山狗太、狗嫫蛇就無恁得人惜也，因為厥皮膚有保護色，分樹梗抑係燥葉仔壅到共下个時節，一無注意就會害人分佢嚇著，故所佢盡惱山狗太。

恁多年過去咧，崁下該頭杳仔樹早就毋在也，毋過，該童年个回憶，哪久就恁香甜个放在吾心肝肚。

³ 青鸛仔：音 qiang' li' e；綠繡眼。